



La dì prime le none Sunte e veve preparât le “liscje”, po cul jutori de gnagne Rine e veve resentât chê blancjarie, biele blancje, sflandorose apont, par vie de cinise, altri che il “Dash” e cumò e faseve biele mostre di sè une volte metude a suiâ.

Cussì Sunte tor lis dôs dopo misdì, le veve palpade, e jere scuasit sute, tor les cinc e varès ritirât i bleons, che a saressin stâts prontos par sedi sopressâts...

Ce biele zornade, e pensà, stant che îr al veve plot dut al dì, cence remission.

Ce vûstu di miôr Sunte, si diseve tra sè e sè, no veve fat i conts cun chê ribaldarie che e jere saltade fûr dal borc di sot ,cul balon in man par zuiâ tal mieç de strade, in chê volte une strade blancje.

Nuie pôre, le furgonete de pieçamente di Amorino e sarès tornade a cjase tor sîs di sere, no prime, duncje nissun al varès disturbât chê partide di balon.

Nissun altri? Mmmm...

Le none Sunte, tornade dai siei lavôrs dal ort, e jere li par dâi ancjemò un cuc ai sei bleons, che cumò a vevin ca e là bielîs placis tondis di pantan.

Nancje il timp di maraveâsi che une lastre de cjase e leve in mil tocs, po il balon al finive propite denant dai pîts di Sunte.

Noaltris fruts o jerin li denant de reêt metude a cunfin, o jerin spierdûts come pioris... le vevin fate gruesse, intun mari lamp o vevin capît che le partide e jere finide, par cheste setemane e forsit... ancje par chê altre...

Carosello nol jere ancjemò rivât tes nestres cjases, chê sere o jerin lâts su a durmî cence

tantes fufignes e, so redut, cidins cidins...

**di Maurizio Di Fant**

